

欽定剿平粵匪方略

欽定勦平粵匪方略卷二百五十八 辛酉年

十一年正月初六日乙未曾國藩奏言自金壇甯

國疊陷後南陵一邑孤懸賊中總兵陳大富力
守危城糧盡援絕勢難久全臣鑒於金壇被害
之慘恐南陵軍民又遭屠戮於上年疊次密飭
陳大富由閒道衝出並咨商提臣楊載福派師
船至江濱接應九月積雨江漲小港皆可行舟

楊載福定計潛師往援親督礮船進次縱陽探
問南陵城外賊壘密布惟北門一港可達魯港
水程約計百里而近城一帶賊復夾港築壘僅
餘一綫之路當就縱陽調出千總尹昌景等各
領陸兵與礮船相輔而行十月初二日師至魯
港派總兵李成謀等扼紮港口使蕪湖之賊不
得截我出路初三日進港見沿途水而狹隘恐

賊乘我之後復派參將楊占鼇等領兵步步爲
營初四日水陸並進港左守壘之賊遽擁出撲
副將丁泗濱等率師奮擊斃賊多名焚燬各壘
尹昌景等領隊直攻港右衝入賊陣逆衆敗潰
其另股賊匪乘勢橫抄副將李朝斌領師船開
礮轟擊賊稍退卻尹昌景等併力衝殺賊盡披
靡遂將港右十數壘全行焚燬陳大富知北路

援師已至乘勝將東南西三門賊壘一律掃平
追殺十餘里斃賊無數立解南陵城圍陳大富
猶思趕緊繕完力圖守禦楊載福以水師旣難
留駐該逆必將復至孤軍久守終成坐困因勸
陳大富拔出全軍同赴上游初五日督隊徐行
百姓從者十餘萬衆僞忠王李秀城率賊黨數
千賊划百餘在小河及石碓地方意圖截我歸

路經楊占釐等竭力堵禦楊載福復添派親兵
助勦將賊擊退水陸軍民始得出港二十五日
抵黃石磯十一月初三日安插軍民於東流縣
城妥籌周恤查楊載福此次出奇制勝保全甚
衆足以作士氣而固人心可否額懇

天恩賞賚物件以示旌異出力將弁可否由該提臣擇
尤保奏均出自

聖主鴻慈奏八

上諭內閣曰安徽南陵縣城久被賊衆圍困總兵陳大富竭力守禦待援孔亟經提督楊載福統帶水陸各軍由北門外之魯港進兵將賊壘全行焚燬陳大富乘勢將東南西三門賊壘一律掃平拔出南陵全軍保護百姓十餘萬人妥爲安輯楊載福出奇制勝調度有方深堪嘉尙著發去大荷包一對小荷包四箇

白玉搬指一箇白玉翎管一枝小刀一把交該提督
祇領其餘出力將弁並著該提督擇尤保奏候朕施
恩

曾國藩又奏言江西自上年賊犯建德普承堯
一軍潰退賊卽長驅深入連陷六縣而官軍與
賊必爭之地莫如湖口與景德鎮景德有左宗
棠一軍駐紮湖口則並無陸兵僅有都司丁義

方水師駐防臣於建德失守後卽派遣員吳坤
修帶團防營千餘人馳赴湖口防守道員彭玉
麟復派副將成發翔馳往會同守禦並親由黃
石磯赴援十一月初九日寶營潰勇逃至湖口
成發翔等擇留精壯五百人分布城頭駐守吳
坤修團防營亦於是日趕到沿途爲賊所截把
總李逢貴六品軍功吳脩霖力戰陣亡營官吳

景星熊烜煌督率所部入城當命寶營國防營
陸師駐守東南兩門以防山城成發翔丁義方
自率水師駐守西北兩門以防水城十二日賊
自彭澤率大股上竄湖口屯踞離城十五里之
馬影橋十三日賊衆萬餘分四股直撲各門我
軍併力擊退旋復昇長梯而至其東西南三股
先進對城開槍子密如雨繼以木梯蠶擁爬城

城上礮石齊下迄不稍退丁義方見賊勢兇悍率哨官張三元等帶水勇登陴助戰熊烜煌等往來擊殺自申至酉齊力抵禦而城南適有缺口趕修未成悍賊數名冒死登城經千總江必勝砍倒並以大桶火藥擲轟城下斃賊無數賊始退去我軍開城追殺百餘人奪獲木梯三百餘架賊仍退踞三里街馬影橋等處十四日謀

知賊於村莊搜覓樓梯欲乘風雨夜半爬城彭
玉麟飭令談開亮選帶十餘人潛出偵伺遇賊
負梯送三里街奪獲多件是夜風雨益甚咫尺
莫辨彭玉麟在城垣督飭各營分投梭巡見四
山僻徑隱隱火光自遠而近各營哨冒雨立堞
口靜以待動守至天明派勇縋城哨探則三里
街及馬影橋已無賊蹤詢之民人言該匪竟夜

環伺無隙可乘至五鼓向都昌大路竄去彭玉麟防其回竄函商總兵陳大富由東流抽撥千五百人協同吳坤修駐守並探知另股賊匪已陷都昌當派成發翔戰船二十一號赴援十五日趕至都昌撲礮轟擊城賊不敵我軍乘勝登岸由大南門追至城根賊衆慌亂開東北兩門而竄立將都昌縣城克復查廣東惠潮嘉道彭

玉麟力捍危城維持大局洵屬調度有方副將
成發翔樸實果敢都司丁義方膽識過人部署
迅速均應先行開列懇

恩獎勵陣亡把總李逢貴軍功吳脩霖均請

飭部照把總例從優議卹其餘在事出力將弁可否准
臣擇尤保獎出自

聖主鴻施奏入

上諭內閣曰廣東惠潮嘉道彭玉麟赴援湖口數日之

閒將大股悍賊擊敗力保危城並派兵克復都昌縣
城洵屬調度有方著交軍機處記名遇有按察使缺
出題奏副將成發翔著賞給協勇巴圖魯名號都司
丁義方著以參將補用並賞加副將銜陣亡把總李
逢貴軍功吳脩霖均著交部照把總陣亡例從優議
卹其餘在事出力將弁著會國藩擇尤保奏候朕施

恩

會國藩又奏言臣於上年九月調集鮑超張運
蘭兩軍進偪休甯分紮西館迪祥湖一帶因上
溪口江灣兩處爲賊南竄之路當於徽防調撥
數營令已革副將楊名聲整理成軍駐紮上溪
口並飭副將王夢麟所帶良勇協同副將程永
年兵勇合紮江灣以資扼守自十一月十四日

鮑超一軍由西館撤赴景德鎮之急而上溪口
江灣兩處防兵頗形單薄正深焦慮據楊名聲
稟稱十六日休甯賊匪四五萬人分路來犯上
溪日南岸之賊被我軍槍礮環施遂涉水過河
併力夾攻北岸營盤都司譚加耀帶隊往來鏖
戰斬馘數百人該逆絕無退意楊名聲俟其氣
餒正欲督帶馬隊由南岸前往策應該逆突出

一股從街市之後繞來撲犯千總胡明昭棄營而走各勇登時驚擾楊名聲親堵濠邊手刃二勇衆心稍固而北岸諸軍又被賊圍楊名聲馳馬過橋接應被騎賊從後追刺受傷落水各營弁勇傷亡過半不敷守禦持至酉刻南北各營先後失陷又據王夢麟稟稱十四日屯溪賊匪撲犯江灣被我軍擊退十五日該逆大股傾巢

而來王夢麟飭各軍憑營固守程永年親督守
備馬登榮等率弁勇三百人往來抄擊逆衆始
退忽分數十股由遠山繞赴江灣村市散紮復
於村頭各處築卡王夢麟卽督帶馬登榮等同
村鏖戰該逆死力相持馬登榮怒馬衝擊中槍
陣亡外委鍾洪興楊大榮亦歿於陣李金山又
受矛傷正鏖戰閒忽報賊衆圍撲我營王夢麟

恐營盤有失卽帶隊回顧各營賊以木石堆卡
阻我迎擊之路王夢麟諭令各營奮勉出戰賊
仍重重圍裹不得已會商程永年督軍巷戰分
路衝出以圖再振江灣營盤遂陷查江灣上溪
口兩處均屬要隘一有疏失則藩籬盡撤賊得
長驅以入江西已革副將楊名聲副將王夢麟
程永年駐防數月有險可扼乃不堅守待援實

屬怯懦無能王夢麟程永年均應請

旨革職不准留營楊名聲係業經叅革之員亦不准留
營潰退兵勇交署湖北提督江長貴收集整理
陣亡員弁應請分別議卹以慰忠魂奏入

上從之

曾國藩又奏言僞忠王李秀城上年十月率大
股突擾黔縣經鮑超張運蘭擊敗後繞入徽城

旋竄婺源擾及玉山而羊棧各嶺外賊蹤時復
麇聚窺伺祁門北路臣飭參將楊鎮魁遊擊蔣
信五分帶兩營協同參將張應超一軍在距羊
棧嶺十里距黟縣二十五里之盧村駐紮十一
月十七日逆目古濠賈等糾合大股分三路突
犯羊棧桐林二嶺乘霧入卡遠抄盧村諸營之
後我軍閉壘堅守張運蘭派隊往援楊鎮魁等

開壁齊出併力夾攻斃賊三四百人賊由新嶺遁去十九日嶺外添賊萬餘於盧村左側築造二壘爲久踞以犯祁門之計時鮑超赴援景德之軍因阻雨尙在祁門遂派副將宋國永率隊馳赴黟縣二十日諸軍會合分路抄擊賊勢大潰跟蹤追殺伏屍遍野餘匪緣崖紛竄逃出嶺外自是嶺外之賊不敢內犯而休甯城中之賊

因鮑超回勦景鎮我軍益孤賊勢益張張運蘭
思所以懲創之二十四日派易開俊劉松山克
明朱紹輝各帶隊分路搜洗而進行至小溪該
逆列隊鏖戰我軍大集賊勢不支乘勝追殺斃
賊約三百人把總賀元峯力戰陣亡餘匪退踞
藍田又有另股萬餘自浙而來在鄧公橋一帶
屯聚與休甯之賊互爲聲援偏近漁亭一路臣

因鮑超撤退後惟漁亭爲前敵最要之區飭令
張運蘭派湘勇兩營宋夢蘭帶安勇兩營又留
霆字四營合紮漁亭以厚兵力二十六日逆衆
萬餘徑犯漁亭見我軍出擊踞橋抗拒我軍分
路抄殺該逆不敵奪命狂奔追至崖腳斬僞宰
相僞喧傳僞將軍僞指揮四名老賊千餘名忽
上溪口之賊從南路來犯我軍遂自東路收隊

回營申刻賊衆萬餘衝至濂亭街口婁雲慶等
分路掩殺至牌頭嶺日已向暮陳青雲等督隊
過嶺追至當金街山路險窄不能排隊陳青雲
胡克勝衝入街內遇伏陣亡婁雲慶等各督本
隊截殺伏賊數百名收隊回營查黟縣各軍十
日之內凡四大戰東奔西救有戰皆捷盧村一
役該逆精銳殆盡尤足以寒賊膽而快人心至

臣在祁門賊分三大枝環擾其西一枝經臣派
鮑超赴景德鎮與左宗棠會剿賊自景德退至
石門洋塘一帶仍分黨擾建德彭澤卽湖口之
賊亦尙屯踞張家嶺一帶其東一枝由婺源開
化竄撲玉山縣城十一月晦日十二月朔日城
中竭力防守未知能否迅速解圍其北一枝經
十一月間屢次痛剿現尙未敢再犯如能將西

聞

路一股大加懲創自可分兵援應東路不使深入江西腹地皖南軍務可期日有起色奏入報

初十日

己亥

劉長佑奏言石達開悍黨僞國宗石

鎮吉逆甥黃貫生僞宰制陳于麟等前撲百色
聽城經兵練擊敗折回慶遠路過安定爲該土
司潘梧所擒解送思恩府署知府徐引因賊氛

喫緊原擬將該犯等在府正法旋以道路稍通
解省究辦 臣督同司道親提研審據該犯等供
認先同石達開擾犯江南江西各省嗣自福建
與石達開分股竄陷廣東湖南沿邊各州縣直
至桂林皆石鎮吉爲首石達開後由寶慶來會
潰赴慶遠石鎮吉復踞賓州趨攻百色致被擊
敗擒獲等情當將該犯等凌遲處死以彰

天討

同日胡林翼奏言兩江督臣曾國藩上年調總兵鮑超等軍渡江勦辦皖南賊匪派曾國荃曾貞幹留圍安慶牆濠深堅賊勢漸已窮蹙探聞首逆陳玉城復糾約李秀城併力西犯其大股賊匪均從南岸渡江而北會於無爲廬江以圖急援懷桐提督楊載福副都統多隆阿臬司李

續宜前因安慶縱陽日有警變於十二月初八日會集縱陽安慶相度地勢審量賊情布置已定其多隆阿李續宜二軍仍堅扼桐城以備援勦臣於十二月十三日紮營太湖以顧後路兼與前路桐城驛報捷近均奏入報

開

十二日

辛丑

瑞昌王有齡奏言上年婺源大股賊

匪竄至華埠窺伺常山臣等飛飭訓字營由古城赴常防守並飭閩兵前往駐紮東門外十一月二十八日賊撲常山我軍會同民團擊退斃賊無算三十日賊以馬隊衝撲東門臺灣勇接仗獲勝該逆復分股環撲西南北三門署知縣王蘭帶勇守禦因訓字營潰散縣城遂陷王蘭帶傷出城參將劉金標督閩兵由東門截擊賊

匪衆寡不敵退紮招賢地方臣等當卽移咨饒
廷選將省城兵勇抽撥四千餘名分水陸兩路
前往勦辦張玉良聞警派副將周萬遠一軍由
淳安拔隊馳赴衢防而賊已擾及江山縣境十
二月初六日大股撲犯縣城知縣高斗南所帶
民團不敷抵禦縣城失陷署金衢嚴道莊煥文
衢州府知府江允康將參將林文察一軍調赴

江山並令周萬遠一軍赴常山分投攻勦臣等
復派副將陳步高帶勇三千名赴嚴協防張玉
良添派副將郭啟舉參將蔡致貴已革遊擊翦
體祥各帶兵勇三千四百名均歸總兵李定太
調度該總兵又自帶小隊礮船由壽昌龍游水
陸並進旋准署衢州鎮總兵崇志函稱江山之
賊擾及大溪灘一帶初十日林文察馳往接仗

擊斃賊匪及落水死者無數生擒賊首一名餘
賊由東南逃竄我軍因天晚雨雪在大溪灘駐
紮俟雪止進攻縣城常山之賊俟李定太大隊
到齊併力痛勦等語臣等正在會商布置忽據
於潛餘杭等縣稟報千秋關外逆匪自獅橋至
甯國節節紮營十二月初四日竄進千秋關連
日竄至於潛擾及臨安縣界離餘杭亦僅三十

餘里臣等令饒廷選暫緩赴衢留省會商勦辦
派副將楊金榜遊擊王振聲劉長培都司劉加
玉各帶兵勇三千餘名由餘杭進攻臨安又令
副將文瑞撥勇五百名在後接應並調水師破
船令副將費廷芳統帶扼守富陽江面兼防東
竄甯紹之路嗣賊由臨安至青山五柳橋一帶
窺探意圖下竄十二日楊金榜行抵青山遇賊

接仗追殺十餘里斃賊甚多新城縣六珠江等處亦有賊盤踞十二日分路直竄富陽江口我軍礮船駛往抵禦斃賊數十名餘賊敗回六珠並分竄距窄溪七里之紅廟紮卡貴廷芳已分派礮船防守各處要隘又另股賊匪由昌化竄至分水縣之印渚埠並有安徽賊匪數萬竄至孝豐而嘉興之賊又在南河豫備礮船意圖南

竄查各路賊勢蔓延浙東浙西同時喫緊大有
圍繞杭州及下窺衢嚴旁擾甯紹之勢省城已
抽調各隊五六千人兼顧爲難且石門海甯一
路尙有吳再升馬德昭各軍可期抵禦孝豐武
康一路並無防兵如竟內犯省城尤爲危迫賊
衆兵單實有防不勝防之慮惟有飛催統兵各
員分投攻剿速靖逆氛至失守城池之署常山

縣知縣王蘭江山縣知縣高斗南相應請

旨先行革職責令帶罪圖功以觀後效其餘在城文武
員弁俟查明下落另行辦理奏入

上諭曰省垣固屬緊要近防不如遠勦仍應迅籌撥兵
抵禦

上諭內閣曰署常山縣知縣王蘭江山縣知縣高斗南
失守城池均著先行革職仍責令帶罪圖功以觀後

效其餘在城文武下落著王有齡查明具奏

十四日癸卯毓科奏言自上年建德失守普承堯

一軍潰退左宗棠恐賊竄饒郡當將克復德興
暫駐婺源之師調回景德鎮賊竄石門饒郡戒

嚴維時署浮梁縣知縣陸長慶到任甫及旬日
尙未設防十一月十一日突被大股關入縣城
陸長慶馳赴景德乞援左宗棠飭各營循河岸

繞出截勦賊見官軍大至鼠伏不出隨派老湘營桂勇駐紮黃泥渡兼顧城鎮派中營及前左右等營出六成隊於十三日進攻浮城留後營守里市渡以中營親兵守景鎮下游之西瓜洲賊之踞羅家橋者伺我軍上赴浮梁卽擁至對岸攻里市渡浮橋旋有騎賊百餘步賊數千由中渡馳至西瓜洲均經我軍擊退踞城之賊見

官軍往攻亦卽竄山留軍駐守而還十四日賊以千餘人列里市渡以千餘人列中渡其大隊直趨西瓜洲涉淺過河我軍左右包抄賊衆驚潰追斬悍賊百餘生擒數十溺斃無算賊復揮中渡以下數股擁至河邊我軍列陣洲上斃賊極多賊始退竄當於鷺頸灘密釘樹椿以阻賊騎並飭各營防守灘口自浮城至朱村四十餘

里分屯列戍二十四日探報賊目黃汝金率黨
萬餘由湖口都昌竄至嚴飭各營戒備二十五
日賊分數路排列騎賊由老虎灘衝過我軍力
扼灘口擊斃多名賊目李遠繼率大隊由上流
高家灘過河直趨景鎮我軍由裏村捷徑迎勦
參將丁長勝首先衝鋒各營繼進三路圍攻陣
斬僞指揮三名李遠繼亦受傷餘逆敗竄過河

我軍乘勝追擊斃賊數百名二十七日賊目黃
汝金擁衆撲犯浮城仍圖過河均經我軍擊走
賊見我軍防守嚴密技無所施黃汝金一股竄
踞都昌之張家嶺一帶餘由規田遁回石門洋
塘等處二十八日鮑超一軍抵鎮遂進紮曹家
渡左宗棠亦移師茅屋嶺再圖進剿至饒州府
城坍塌多年無險可憑署知府彭宗岱參將孟

德芳鄱陽縣知縣熙恬等聞警時會督兵勇赴
近城路口扼守並趕集鄉團協助堵禦詎賊分
股閒道疾馳已於十二日竄至四十里街十三
日直撲靈芝門先鋒騎賊數百闖入郡城幸水
師遊擊任星元等暨江軍留防水師駐泊城河
及古縣渡等處任星元等率礮船轟擊斃賊甚
夥彭宗岱孟德芳等率師夾攻擒獲長髮賊多

名該逆不能踞守退遁距城六十里之花橋其
分樸古縣渡之賊十四日經礮船擊退歸併石
門洋塘任星元率師船進紮童子渡助勦查此
次賊衆內犯江境欲得景鎮以爲巢穴斷祁門
之餉道解安慶之重圍以致浮鄱二邑皆被竄
擾左宗棠一軍不滿六千當數萬兇悍之寇將
士奮勇用命異常出力可否由臣會商督臣曾

國藩擇尤酌保以示鼓勵出自

聖主鴻施署浮梁縣知縣同知陸長慶甫經接任猝不
及防致賊闖入縣城雖情尙可原究屬疏於防
禦相應請

旨暫行革職仍留署任以觀後效饒州營參將孟德芳
係專城大員署饒州府知府彭宗岱鄱陽縣知
縣熙恬各有地方之責惟無城可守且克復迅

速功過尙足相抵應請免其置議奏入

上諭內閣曰浮梁饒州各城被匪闖入旋即擊退出力將弁著毓科會同曾國藩保奏署浮梁縣知縣同知陸長慶雖甫經抵任猝不及防究屬疏於防禦著改爲革職暫留署任饒州營參將孟德芳署饒州府知府彭宗岱鄱陽縣知縣熙恬均著改爲革職留任以觀後效

毓科又奏言上年賊踞河口鎮有另股萬餘屯
踞貴溪縣境窺伺樂平德興經臣飛咨左宗棠
分軍援剿十月十九日遊擊王開琳等拔隊前
進二十二日行抵鶴嶺翻山進擊斃賊三四百
名該逆大股麕至我軍分路包抄斬賊目多名
賊衆四五百名由周坊追至丁家坊直擣賊巢
斃賊二千餘名生擒一百八十名餘賊由弋陽

竄至德興縣境該縣城缺兵單署知縣雷嘉澍
方在南鄉集團備禦二十五日被賊襲陷縣城
雷嘉澍聞警折回率勇攻城未下左宗棠飭道
員王開化等往援二十九日敗賊於楓樹嶺適
老湘等營由弋陽追賊踵至樂平團練亦往助
勦是夜會合進攻直薄城下賊由南門分竄雷
嘉澍等隨同克復城池搜捕餘匪安撫難民各

營乘勝追賊向徽州之婺源而去查德興被陷
雖由城缺兵單究屬堵禦不力相應請

旨將署德興縣知縣雷嘉澍卽行革職以示懲儆同城
文武查明另行辦理奏入得

旨雷嘉澍著卽革職

毓科又奏言上年皖逆闖入彭澤因官軍繼至
未及占踞率黨圍攻湖口復被官軍擊退其另

殷寬陷都昌旋經克復除尤爲出力之彭玉麟
成發翔等業經督臣曾國藩奏請獎敘外臣查
前任廣東南韶連道吳坤修協守湖口都司胡
友勝赴援彭澤均屬奮勉可嘉吳坤修擬請

賞加鹽運使銜胡友勝擬請以遊擊升用以示鼓勵至
署彭澤縣知縣南康府通判呂廷楷當普承堯
一軍潰退時辦解銀米冀持危局因寶勇再潰

以致縣城被匪闖入情尙可原惟不能立遏寇氛究屬疏於防範應請

旨暫行革職仍留署任責令辦理善後事宜以觀後效
都昌縣知縣富倫泰失守城池已難辭咎乃以
赴鄉集團墜馬受傷爲詞延不回城現復具稟
乞休實屬謬妄且據稱聞警時因居民遷避出
城彈壓等語恐有捏飾情弊應請

旨先行革職俟查明有無棄城逃避情事再行從嚴叅
辦奏入

上從之

十七日丙午曾國藩奏言湖南一省向稱瘠苦之

區年來防勦本省援應鄰封兵勇分道四出而
餉糈猶能爲繼良由經理得人取民有道前者
勁勦江西協濟黔粵歲費百餘萬兩久在

聖明洞鑒之中本年夏間臣與左宗棠在湖南招募勇
丁數近二萬餉項軍裝爲款甚鉅皆由湖南竭
力協濟得以從容集事臣以一省之物力祇有
此數協助別省者日多則供給本省者日少此
有所盈則彼有所缺本不欲再用湖南之餉致
蒙竭澤而漁之譏無如添募勇丁添製槍礮添
造船隻在在與湖南交涉不得不藉資湘中之

力以濟皖省之師爰與湖南撫臣熟商札飭臬司裕麟道員黃冕鄭元璧等會同藩司文格在於長沙設立東征局凡鹽茶貨物酌抽釐金於商民稅則所增無幾而於本省釐務兩不相妨臣與官文胡林翼等所統各軍同係東征之師同值缺餉之際議定東征局所籌餉項以三分之一解江西糧臺協濟皖南一軍以三分之一

解湖北糧臺協濟皖北一軍又會同遴派官紳
設立分局襄同辦理本年七八月內次第開局
臣以隔省籌餉事涉繁難未敢遽行入奏九月
間規模漸定衆情胥協洵屬力拯時艱著有成
效惟是另設一局與本省抽釐不同凡鹽茶各
商抽收較多者應倣照江西茶捐之例給予獎
敘近歲以來屢蒙我

皇上諭旨褒嘉湖南官紳有裨大局今茲時事彌艱猶能多方籌措謀及皖吳之師雖出自該局官紳報

國微忱亦足見

聖主仁言感人之深有以激發於不自己者奏入得旨允行

十八日丁未都興阿奏言上年因蘇常失陷江防

契緊經李若珠奏調浙江溫州鎮總兵吳全美
定海鎮總兵李得麟各帶師船駛赴下游九月
自蕪湖來揚沿江一帶逆匪開礮攔截該總兵
等且戰且行擊沈及焚燬賊船十一隻斃賊百
數十名抵九洑洲復有大股賊船橫截江路該
總兵等督領戰船鏖戰多時擊沈賊船四五十
隻餘匪遁回內河並擊倒江邊望臺土壘斃匪

甚多守備吳奇勳等復駕燬艇駛入江口口內
賊船出撲守卡逆黨開礮抗拒都司沙成祥等
踴躍登岸槍斃黃衣賊目二名羣賊驚竄追殺
百餘名賊船悉數焚燬斃賊無算立將賊卡礮
臺踏平查該將士等衝鋒獲勝足振軍威當此
水師防剿喫重合無仰懇

天恩准臣查明尤爲出力員弁兵勇酌量保奏以昭激

勸出自

鴻施奏入

上諭內閣曰水師沿江勦賊獲勝尙屬奮勉在事出力員弁英勇著都興阿擇尤保奏候朕施恩

都興阿又奏言上年御史蔣超伯條陳江北防勦事宜欽奉

諭旨命臣體察情形酌量辦理原奏所稱駐瓜州以兼

顧儀揚一條查瓜州濱臨大江地處揚城之南
距揚四十里儀徵天六均在揚城之西揚防各
營上至高郵下至瓜州接連百十餘里處處喫
重當湖淺水涸之時高邵一帶防勦更宜嚴密
迤南自三汊河至瓜州有副將詹啟綸一軍節
節布置聯絡水師直接鎮防其仙女鎮等處爲
揚城後路現當靖江通泰一帶不時戒嚴甚關

緊要已飭副將英貴一軍紮於三道橋迤東以
資策應就現紮各營形勢惟揚城附近之五臺
山爲各路衝要居中之地臣現已移紮該處隨
時調度至練水師以嚴防通泰一條查通泰海
門各州縣與常熟江陰各海口僅隔一江誠非
陸路所能抵禦現在下游江面有遊擊郭定猷
張瀚等會同都司龔致福巡船分泊兩岸迤下

之福山口江面有總兵李德麟師船分布防剿
裏下河門戶不致疏虞其水師正餉本由江南
糧臺支應吳全美李德麟勇糧各項歸江北糧
臺動支與該御史所奏適相吻合又大儀宜紮
重兵一條查大儀在揚州迤西與六合天長儀
徵相距均止數十里地當孔道遠闊無險偏近
賊氛若孤軍進紮三面受敵揚防兵勇勢難聯

絡刻下四路布置雖似守局而賊匪蠢動卽可
相殘辦尙不至顧此失彼至西面宜辦團練
一條查天六二邑毗連甘泉儀徵各鄉距賊較
近民居星散人煙寥落能否舉行團練現飭揚
州府知府顏培瑚酌量情形竭力勸辦總期行
之以實不敢徒託空言奏入報

二十四日癸丑慶端瑞瓚奏言武平踞賊經臣等

添調勁旅進剿上年十一月初九至十四等日
屢獲勝仗踏毀賊營三座斃賊百餘名該逆敗
竄回城伏匿不出二十六日分隊進攻逆衆千
餘出戰我軍四面圍擊斃賊二百餘名生擒八
名該逆被創後運米入城意圖死守據護理汀
州鎮總兵袁良稟報親帶精兵赴武平中堡地

方督勦臣等當飭乘勝進取迅圖克復旋據代理汀軍同知程鐸稟報該員赴鄉催徵於十二月初二日探知另股賊匪由江西貴陽竄至瑞金汀郡喫緊隨即由鄉趕回初三日行抵南山壩遇城內逃出難民知本日賊已攻陷郡城當卽親督鄉團馳救遇賊於河墩斬獲數名忽有大股自東門出援練丁衆寡不敵紛紛潰散現

在南山壩駐紮雇募精勇並添調鄉團分駐各隘以圖恢復等情查此股賊匪由湖南桂陽竄出經江西境突入汀州勢殊剽疾賊衆共二二萬人兇燄甚張漳龍延邵四屬均形喫緊而延平之永安將樂緊接歸化連城該郡爲省會藩籬上游鎖鑰尤恐逆匪勾結武平之賊分竄滋擾且河口股匪現復回竄三衢探報常山江山

兩縣均已不守江西之玉山亦有賊蹤閩省崇
浦邊防紛紛告急逆氛環逼亟須分軍堵剿現
將知府張啟煊一軍暫留浦城駐仙霞嶺一帶
以堵江山一路海壇兵三百名調赴崇安以防
玉山一路又添調興化福甯閩安兵一千二百
名交遊擊戴慶吳統帶並派知府張銓慶等募
勇一千名均赴延平扼紮相機進剿一面飛飭

汀漳龍道黃安綬募帶漳勇馳赴永定親督調
度另調水陸提標金門鎮標精兵一千一百名
交遊擊李世雄統帶由漳泉間道赴汀會同袁
良許忠標等軍合力攻勦遊擊蔡元一軍現已
到汀飭令抽撥二百名扼紮龜嶺以三百名駐
守觀前地方力杜該逆窺竄連城清流之路並
飭連城清流各縣親督民團協同堵禦惟綜計

兵力尚單且逆匪分趨汀衢閩浙同時告警自
應通盤籌畫查署金衢嚴道彭斯舉所部平江
營七千餘人近在玉山一帶業經臣慶端檄飭
赴衢督勦恢復江常各城並飭曾玉明酌帶臺
灣漳州兵勇三千名兼程回閩以解阡危俟汀
郡稍鬆再令赴浙其禧祿等所帶兵勇二千五
百餘名仍留衢防至護汀州鎮總兵袁艮於郡

城失守時先期帶兵赴武平勦賊並未在城第
不能豫爲防範究難辭咎已責令迅圖克復以
贖前愆億稍存畏縮卽行嚴禁暫委程鐸兼理
汀州府篆飭令號召聯丁布置防勦務期速除
醜類力拔堅城奏入

上諭內閣曰武平續獲勝仗另股粵匪突陷汀州府城
現經慶端等檄調兵勇進勦著卽督飭將士迅速攻

克府城殲除醜類毋留餘孽護汀州鎮總兵袁良雖
帶兵在武平勦賊究屬疏於防範著交部議處仍責
令奮力攻勦以贖前愆儻遷延觀望卽行嚴叅代理
汀軍同知程鐸據報先期赴鄉催徵是否屬實著該
督等確切查明如有畏葸逃避情事卽著從嚴叅辦

欽定勦平粵匪方略卷二百五十九 辛酉年

二月初三日

辛酉

都興阿奏言正月初旬天長髮

逆勾結捻匪陳自明直撲金溝當派守備陳浚
家等各帶礮船分路進攻距該逆在南宮廟搭
造浮橋搶過北岸由旱路繞至塔兒集等處我
軍登岸迎勦連日斬馘頗多初十日賊衆由金
溝西岸突出二千餘人官兵佯爲撤動誘其離

巢返戈回擊殲斃亦復不少遂密飭各隊四處設伏當將浮橋焚燬我軍搶過西岸盡力追殺約斃賊二千餘人餘賊向天長一帶分路竄逸十六七等日該逆約有三千餘人突至大儀集等處聲言直撲瓜揚另股賊馬圖竄邵伯經參領海全派令委參領富升等各帶馬步隊行抵大儀地方該逆列陣迎拒富升等帶領馬隊直

前衝擊李有才等分左右兩路前進孫文友搆
其中堅逆勢不支追殺十餘里斃賊甚多當卽
收隊回營至江陰黃田港有賊船數百隻新溝
有長龍賊船八十餘號日在君山演礮並至常
州辦船計圖北竄下游江靖一帶水路防務喫
重現添派參將刁經明酌帶礮划馳赴下游會
同原泊師船妥爲布置並令總兵吳全美調撥

快蟹礮船剋日下駛一體防禦以固江北藩籬
同日楊載福奏言上年十一月二十二日首逆
陳玉城率衆萬餘來攻縱陽以圖進援安慶經
總兵李成謀督同遊擊章志俊飭令各營靜鎮
固守賊卽踞於附近之七里亭地方章志俊在
縱陽街頭築立一卡力扼要衝李成謀分派三
板船拖入蓮花池內護衛營卡二十四日賊衆

在下縱陽河岸攻撲水營時水落岸高師船礙
施無準李成謀飭勇在羅塘洲安礮對岸轟擊
斃賊多名賊乃分股於隄內掘壩欲洩蓮花池
水使師船不得停泊以圖便於攻卡副將左光
培於洲上添排大礮李成謀並調集擡槍齊向
隄內轟擊韋志俊亦派隊由陸路出攻掘壩之
賊始退當於該處築卡扼守二十五日該逆全

力攻上縱陽街卡章志俊督飭伊昌景等營極力守禦臣慮章志俊兵力太單卽於是日帶參將陳代友等率正左正右兩營策應該逆忽退踞官埠橋意在別尋路徑查縱陽小河溯流而上約百餘里可通安慶之路甚多臣隨於二十八日督率師船擇要設防以斷該逆暗渡擾皖之路賊見無隙可乘由官埠橋復竄縱陽占踞

附近各山築壘多座連日出隊爭撲均經官軍擊退正月初一日賊又分數股襲縱陽上下各卡我軍豫爲設備賊不得逞遂於初三日仍退往官埠橋盤踞我軍卽將附近賊壘概行鏟平惟官埠橋距縱陽僅二十餘里難保不復來窺伺臣仍督飭各軍認真堵禦以免疏虞均奏入

報

聞

初六日

甲子

王履謙奏言

臣

幫同前漕

臣

邵燦辦

理團練節次會同商辦旋奉有邵燦撤去團練

大臣之

諭而臣

應否仍前幫辦未蒙

訓示現在杭州所屬餘杭於潛昌化臨安新城等處俱有賊蹤富陽與紹興僅隔一江嘉興負嵎之賊

裏脅日增於紹屬山陰會稽等處海口片帆可
渡節節堪虞邵燦前調謝敬一軍駐扼蕭山所
屬義橋豫防東竄刻下遷延待命進退調度尙
無適從邵燦前派職員邵清益等募勇防守山
陰所屬三江會稽所屬澀海所等處海口以備
嘉興之賊現亦無所稟命許乃普暨邵燦前後
所保甯紹在籍勦辦各紳士自奉歸併之

命以來靜候差委未聞撫臣督飭經辦惟有據實瀝陳
將臣應否仍會同辦理浙東團練抑撤歸地方
官辦理之處仰懇

申諭欽遵地方公事藉免貽誤

王履謙又奏言據探逆匪大隊由新城一帶竄
擾富陽省垣並無一兵一勇援剿查富陽與諸
暨蕭山等處僅隔一江蕭山義橋屯紮謝敬姚

勇五百名兵力甚單恐不足資堵禦浙東危在
呼吸伏乞

皇上迅諭閩浙督臣星夜統帶勁旅來浙助剿奏入

上命軍機大臣傳諭王有齡王履謙曰浙西一帶賊氛
充斥浙東防務正形喫重謝敬等所募鄉勇卽著聽
候該撫及王履謙調度至逆匪由新城一帶竄擾富
陽與諸暨蕭山等處僅隔一江謝敬所帶姚勇屯紮

義橋爲數僅五百名不敷堵禦著王有齡趕緊添派
兵勇以資防剿毋令完善之區遭賊蹂躪

上諭內閣曰浙江團練事宜前經降旨令王有齡督同
該省紳士認真經理茲據王履謙奏稱浙東團練事
無專責請旨遵行等語王履謙著仍幫同王有齡辦
理浙江團練

初九日

丁卯

瑞昌王有齡奏言上年十二月閒總

兵曾玉明督辦衢州防務特派參將林文察進
攻江山副將周萬遠進攻常山追張玉良李定
太先後抵衢擬卽赴常督勦彼此同時並舉可
期迅復兩城林文察於十二月初十日在大溪
灘獲勝後十一日卽督隊進攻江城該逆擁出
萬人分路抄襲該參將亦分路迎勦手斬黃衣
賊目一名各兵勇奮勇直前擊斃逆匪數百名

攻毀逆壘二座二十一日移營雙塔底烏木山
兩處次日該逆以數百人出城誘戰常山援江
之賊先伏西山下包抄我軍後路該參將指揮
鏖戰適曾玉明等接應之兵亦到該逆敗退二
十五日林文察等分督兵勇隨帶火器將西山
一帶賊壘十餘座盡行燒去該逆紛紛逃竄自
相踐踏死者甚衆兵勇攀附登城賊匪驚竄伏

軍齊起陣斬首級四百一十顆生擒長髮老賊
一百六十名卽將江山城池收復該縣知縣高
斗南隨同大軍攻克卽令該縣招集難民妥爲
撫慰張玉良等統領全師星夜拔營赴常以圖
恢復十二月二十九日進紮山溪口三十日賊
衆來撲我軍水陸迎勦鏖戰數時賊衆曳兵而
走我軍轟壞逆艇二隻奪獲礮船一隻斃匪數

十名正月初二日已革總兵李定太督同將領
暨該縣知縣王蘭等夤夜分路進攻三里灘該
處之賊以陳村口賊營爲屏蔽不意我軍由山
背潛入三里灘之旁拋擲火彈繼以槍礮該逆
驚竄陳村口之賊見後營已亂亦相繼竄出我
軍追至城下將守城賊目刺斃賊由東南西三
門出拒該總兵同周萬遠首先登城賊愈驚惶

突門而出卽於初三日將常山縣城克復賊由西北竄去我軍追殺二十餘里沿途斬擒甚多遂收隊回城查皖南逆匪先陷常山繼陷江山勢將久踞以爲絕我餉道擾我金匱之計幸俱克復餘匪遠颺所有尤爲出力之員擬請先行獎勵其餘在事出力文武員弁兵勇容再查明擇尤保奏仍飛飭統兵各員嚴防四竄肅清衢

境奏八

上諭內閣曰逆匪竄陷江山常山兩縣城經總兵曾玉
明派令參將林文察督兵進攻江山已革提督張玉
良統帶全師進攻常山兩縣城池先後克復勦辦尙
爲得手福甯鎮總兵曾玉明著賞加提督銜參將林
文察著免補本班以副將儘先補用並賞給烏訥思
齊巴圖魯名號副將惠壽著賞加總兵銜都司劉紹

基著賞戴花翎已革廣西提督張玉良已革衢州鎮
總兵李定太均著開復原官副將周萬遠著開復革
職處分已革署常山縣知縣王蘭已革江山縣知縣
高斗南均著改爲革職留任其餘出力文武員弁兵
勇著瑞昌王有齡擇尤保奏

瑞昌王有齡又奏言已革臬司段光清於上年
四月閒帶兵剿賊隨同饒廷選克復淳安茲往

江常督辦團練又能使各路鄉民協同攻勦迅
克兩城覈其節次勞績尙足以贖前愆可否免
其拏問以觀後效之處出自

鴻慈奏入

上諭內閣曰前因邵燦等奏請令已革臬司段光清統
帶艇師勦匪當經降旨將該革員暫緩拏問茲據瑞
昌王有齡奏官軍進攻江山常山縣城該革員督率

團練協同攻勦迅克兩城尙知愧奮段光清著免其
拏問仍責令帶勇勦賊以觀後效

瑞昌王有齡又奏言查林福祥於咸豐八年帶
兵援浙助守衢州曾以二百人力戰數千之賊
近來浙省軍情較諸八年更爲緊急而知兵大
員尤不易得是以臣等前有將林福祥調署浙
江臬司之請旋於十年十一月初四日奉

旨浙江布政使著林福祥補授欽此該司現在江西當
此防剿喫緊之際惟有懇

恩准其卽赴新任暫緩來京請

訓並令酌帶舊部千人前來助剿容俟軍務稍平再行

奏請

陛見奏入

上命軍機大臣傳諭會國藩毓科曰新任浙江布政使

林福祥前曾帶兵援浙近來浙省軍情更緊防勦需人該員現在江西著會國藩毓科卽飭迅赴新任俟浙江軍務稍平再行來京陛見並飭酌帶所部兵勇千人剋日赴浙毋稍遲延

瑞昌王有齡又奏言已革道員李元度由浙江溫處道調補安徽徽甯池太廣道莅任數日因徽州失守奏叅奉

旨革職拏問該革員失守城池自屬咎有應得惟浙省
逆氛正熾處處用兵該革員謀勇素優臣等先
令招募勁旅數千名以補浙軍之不足儻能親
帶前來會同勦辦尤爲得力可否

飭下曾國藩仍令李元度赴浙差遣責令立功自贖之
處恭候

欽定奏八

上諭內閣曰已革徽甯池太廣道李元度著曾國藩飭
令前赴浙江交瑞昌王有齡差遣委用其應得失守
罪名仍著曾國藩查辦

十一日己巳慶端瑞瓚奏言接據探報該逆竄陷

汀郡後卽分股竄擾羅坑新城河田等鄉並於
河田地方築造木城十二月初七初八等日賊
匪千餘人竄至謝屋大田等鄉兼理汀州府知

府程鐸親督練勇馳往迎擊賊卽敗逃十五日
賊匪竄至龜嶺腳下復經駐守龜嶺之遊擊葉
榮元督率兵勇下嶺奮擊該逆退回羅坑其武
平踞賊於十二月十四十五等日分路攻撲遊
擊許忠標營盤該遊擊督勇迎勦賊勢不支紛
紛敗竄我軍追殺二十餘里該逆退回武平縣
城又據探報廣東平遠之賊全數竄至武平城

內製造雲梯圖攻上杭伏思汀郡武平兩股之賊雖未聯爲一氣而日久負隅已成犄角之勢難保不併犯上杭窺伺龍巖漳州尤難保不圖竄連城清流窺伺延平邵武必須厚集勁旅分紮上杭連城清流各路庶可聚而殲旃現將先後所調漳州兵九百名交署遊擊許忠標統帶並飭添募壯勇合爲一隊由上杭前進兼顧上

杭一路遊擊葉榮元一軍暨續調之兵一千一百名交護總兵袁良統帶由連城前進將興化兵勇一千名交候補知府張銓慶統帶由清流前進仍歸袁良調遣尙有同廈壯勇並令由永安前進相機攻擊一面檄飭升任福建臬司黃安綬帶勇馳赴永定上杭一帶擇要扼紮署延建邵道揭垂奎回駐延平會督調度總計兵力

尙形單薄且汀屬隘口林立防不勝防復飭會
憲德會商汀州府縣號召聯丁協力堵剿飛催
升任浙江藩司林福祥親率所部星馳赴汀探
蹤截擊惟前因另股粵匪由瑞金突撲汀郡兵
勇衆寡不敵以致汀州武平郡縣城池相繼失
陷臣等不能先事籌防實難辭咎相應請

旨將臣慶端臣瑞瓚一併交部議處

慶端瑞瓚又奏言升任浙江藩司林福祥所部
各軍均係久經戰陣前因賊匪闖入武平卽派

兵勇二千餘人入閩跟剿嗣因汀郡不守經臣

慶端檄飭該司親督所部馳援迄無一旅到汀
現值汀郡武平賊勢猖獗閩省精銳之旅先因
調派援浙多在杭衢兩防林福祥所部離汀較
近如由瑞金或甯化開道赴汀尅期可到至升

任福建臬司汀漳龍道黃安綬已飭帶勇親赴
永定上杭一帶督率調度迅圖克復軍情緊急
未便更易生手應請

旨將升任浙江藩司林福祥暫令統師赴汀援剿升任
福建臬司黃安綬暫留汀州督辦軍務均俟失
守各城克復後再行北上以專責成奏入

上命軍機大臣傳諭毓科曰前因浙江軍務喫緊諭令

曾國藩毓科飭新任浙江布政使林福祥迅速赴任
並酌帶所部千人援浙茲據慶端等奏賊踞汀郡勢
極狡獪閩省勁旅先因調派援浙多在杭衢兩防惟
林福祥所部離汀較近且於賊陷武平時卽派兵勇
二千餘人入閩跟剿若飭令閒道赴汀剋期可到等
語著毓科查明該員如已起程援閩卽先其所急將
汀州一帶賊匪剿平再令赴浙如尙未入閩仍著遵

奉前旨飭令該員迅赴浙江新任

上諭內閣曰粵匪竄擾福建武平汀州郡縣城池相繼
失陷慶端等未能先事籌防實難辭咎慶端瑞璜著
交部議處升任福建按察使黃安綬經慶端等飭令
在汀州一帶辦理防剿著准其暫緩陞見俟軍務稍
平再行奏請

慶端瑞璜又奏言查匪首王瑞卽王汶廣本係

廣東勇首因在上游勦匪出力經前督臣王懿
德請以把總拔補並

賞戴藍翎復因帶勇巡防得力保請以都司留閩補用
詎該都司製造艇船假名貿易縱令匪黨在洋
劫擄上年夏閒因與下南商民口角卽令匪艇
在南臺地方開礮逞兇復糾集大幫廣艇勾通
粵逆突入海口滋擾若非先事豫防立時撲滅

大局幾爲搖動現又潛回廣東香港地方糾結
匪類欲於本年春閒來閩報復應請

旨將都司王汝廣卽王瑞革職拔去藍翎並

飭下廣東督撫臣嚴飭地方文武密拏務獲就地正法
以絕根株而杜後患奏入

上命軍機大臣傳諭勞崇光耆齡曰匪首王汝廣卽王
瑞以廣東勇首疊次保舉洊升都司並賞戴藍翎乃

不思立功報效輒敢糾集廣艇勾通粵逆突入海口
滋擾現又潛回廣東香港地方糾結匪類意圖報復
實屬罪大惡極王汝廣著卽斥革拔去藍翎著勞崇
光者齡嚴飭地方文武密速查拏務獲就地正法以
絕根株毋任漏網

十二日
庚午曾國藩奏言逆賊黃汶金大股由饒

州連陷江西數縣竄近景德鎮之規田街左宗

棠一軍卽由婺源回駐景德於鎮後馬鞍山一帶修築營壘並飭團練於鎮上之里市渡趕造浮橋十一月十二日派道員王開化等帶兵過河至羅家橋洪源等處遇賊接仗轟斃騎馬賊數名賊始卻退探報賊之大隊已偪浮梁縣城隨飭各營循河岸繞出截擊賊伏不出而伺官軍收隊後竄陷浮梁縣城十三日令各營出隊

進攻浮梁之賊該逆乘虛分撲里市渡及西瓜洲均經我軍擊退浮梁之賊亦卽遁去次日賊復由里市渡等處過河排陣遊擊羅近秋等分出衝擊賊猶抵死拒敵我軍復左右包抄賊始驚潰狂奔我軍泅水追殺立斃悍賊百餘名生擒數十名溺斃無算其對岸之賊復揮中渡以下數股擁至河邊輪放槍礮我軍亦分三層排

列隔水轟擊賊悉竄回洗馬橋珠田界牌等處
此賊匪初次至景德鎮我軍擊退及收復浮梁
縣城之情形也二十三日洗馬橋之賊回竄羅
家橋龍頭山一帶經我軍擊退賊目黃汝金率
黨二萬餘分五路來犯均爲我軍力勦賊衆披
靡傷斃多名賊目李遠繼先以千餘人向葉家
洲牽掣我師而大隊在上流高家灘過河由揚

湖街大路直趨景鎮我軍三而圍攻該逆大敗
返奔我軍乘勝追擊斃賊數百名墮水死者不
計其數其另股賊匪攻浮梁縣城者兩次均經
我軍擊退並陣斬僞指揮三名是時總兵鮑超
由祁門回援景德鎮前隊已到賊相率遁歸梟
田街曹家渡等處此黃汶金大股續犯景德鎮
官兵憑河堅守之情形也嗣左宗棠進扼梅源

橋鮑超進扼洋塘該逆復從下游添集賊黨麕聚於洋塘對岸之雞公坡並由謝家灘泥灣街一帶層層築壘聯絡二十餘里時圖潛撲鮑超營壘左宗棠派遊擊羅近秋等排營雞公坡河邊以護鮑超老營並派桂勇楚右營列隊洋塘左邊以防該逆由童家灘抄襲之路鮑超自率所部由洋塘山左前進一意專擊下游之賊詎

該逆乘夜修搭浮橋渡河而南徑襲官軍營盤
經我軍痛勦賊始敗退遂乘勝三路並進該逆
亦三路迎拒鏖戰二時之久賊勢不支鮑超督
飭各營猛擊直抵浮橋殺斃悍賊二千餘名該
逆奪橋而走懼官軍追勦立將浮橋斫斷鮑超
督軍由淺灘分途過河圍殺賊屍山積內有黃
袍及紅袍賊目十餘名駢死其中乘勢將謝家

灘一帶賊壘全行踏平該逆後隊山岡之賊又層層來援我軍愈戰愈奮將賊衝爲數段該逆狼奔不顧計斃賊四千餘人溺斃逃散者不可勝數逆首林侍發許茂才死於亂軍黃汶金身受重傷該逆現分兩路一由建德回竄青陽一歸併彭澤另股鮑超等分兵跟蹤追勦以靖西路左宗棠仍回駐景德鎮稍休兵力以防東路

此洋塘獲勝之情形也查逆首黃汝金爲著名悍賊自去年十一月撲陷建德蔓延鄱陽浮梁等縣其時臣在祁門三面皆賊僅留景德鎮一綫之路以通接濟該逆盡銳攻撲欲得甘心賴左宗棠之謀鮑超之勇用能大挫兇鋒化險爲夷洵足寒賊膽而快人心所有出力員弁可否併入前案彙保出自

鴻施奏入

上諭內閣曰此次逆匪率黨攻撲景德鎮經左宗棠鮑超督兵奮擊大挫兇鋒勦辦尙爲得手所有出力員弁著曾國藩彙案保奏候朕施恩

曾國藩又奏言祁門西北兩路嶺隘紛歧西路之大赤嶺北路之大洪嶺尤爲扼要臣派副將唐義訓在大赤嶺修築柵卡撥祁門老營更番

戍守大洪嶺係提臣江長貴駐紮扼守正月初六日連接探報石埭大股賊匪同日分犯二嶺大洪嶺一股經江長貴派兵接應該逆退伏嶺腳大赤嶺一股已竄至歷口當派副將唐義訓統領各營馳往迎勦見白旗賊匪約二千餘人擁至石門橋外田隴分股猛撲唐義訓飭各營分路設伏親督兵勇由中路進擊該逆抗拒戰

約半時伏兵齊起包出賊後礮斃騎賊一名殺
悍賊數十名唐義訓乘勢揮令猛進該逆且退
且拒各軍追殺賊屍縱橫拋棄旗幟槍械無算
初九日唐義訓率各軍過嶺仍分路並進賊驚
潰走我軍追勦直出赤嶺之外計斃賊千餘名
生擒一百三十五名陣斬賊首麟添豫古得金
查此股逆匪卽去年十一月內撲犯羊棧嶺竄

踞盧村之賊經我軍大加懲創復敢直犯祁門
意欲攻我不備計殊狡毒此次擒斬渠魁賊之
器械拋棄殆盡所有出力將士籲懇

天恩併入建德案內請獎奏入

上諭內閣曰石埭大股賊匪分犯大赤大洪二嶺經江
長貴督隊將大洪嶺之賊擊退大赤嶺之賊已入歷
日副將唐義訓等馳往迎勦計共斃賊千餘名生擒

一百三十五名陣斬賊首麟添豫古得金勦辦尙爲
得手所有在事出力將士著准其併入克復建德案
內由曾國藩奏請獎勵

曾國藩又奏言和春失事後所用

欽差大臣關防經許乃釗派員送至蘇州撫署城陷
遺失囑臣奏請另頒本擬俟皖南稍有頭緒馳
赴淮揚軍入蘇境再行奏請關防今祁門三面

皆賊臣不能遠赴他處合無籲懇

天恩飭部頒給

欽差大臣關防並令箭旗牌等件由江西遞至皖南
交臣祇領至臣能否親赴淮揚應俟安慶克復
後斟酌情形再行具奏奏入

上諭內閣曰前頒給和春欽差大臣關防上年金陵大
營潰退送往蘇州城陷旋即遺失著該部另行鑄造

並令箭旗牌等件頒給曾國藩祇領

曾國藩又奏言祁門以西係僞主將黃汶金大股現退下隅坂尙力拒鮑超一軍相持未決祁門之東係僞忠王李秀城大股現竄鉛山之吳坊等處有入擾江西腹地之意距臣祁門老營相去六百里外兵力實難兼顧臣已飛咨江西撫臣飭劉于瀄堅守撫州府城飭黃鳴珂堅守

建昌府城並飛調魏喻義一軍駐紮江西省城
豫爲籌防或可保全無虞奏入報